

書名 唐詩品彙九十卷拾遺十卷 嘉靖十六年序刊本  
撰者 明 高棟 輯  
卷 卷一  
內容分類 集-總集-各代-唐  
索書號 集部-總集-35  
編號 D7841100

# 卷一

彩色首頁1

東洋文化研究所漢籍目錄 編號: D7841100

東洋文化研究所漢籍目錄所藏漢籍善本全文影像資料庫 索書號: 集部-總集-35

漢籍善本全文影像資料庫文本 唐詩品彙九十卷拾遺十卷 嘉靖十六年序刊本

版權所有: 東京大學 東洋文化研究所

使用上的注意事項

唐詩品彙拾遺卷之一

五言古詩上

太宗皇帝 五首

帝京篇 三首

新寧高棟編

落日雙闕昏迴輿九重暮長煙散初暈皎月澄輕素  
朱幌翫琴書開軒引雲霧斜漢耿層閣清風搖玉樹

二

加臨樂館眺聽歡芳節急管韻朱絃清歌凝白雪  
鳳蕭來儀玄鶴紛成列去茲鄭衛聲雅音方可悅

三

唐詩品彙拾遺卷一

皆雕飭乎語言。我則直露其肺腑。人皆專犯乎諱。忌我則回護其褒貶。此少陵所長也。太白又次之。韓愈晚出力追前人。先輩嘗謂南山詩與少陵北征互有優劣。斯言近之。善乎嚴滄浪有云。李杜韓三公之詩。如金鳴擊海香象渡河。龍吼虎哮。鼉翻鯨躍。大鎗大刀。君王親征。氣象各別。予故合三家詩共五篇為一卷。附於五言短調之後。學者觀之。亦足以廣其藻思耳。

唐詩品彙五言古詩叙目終

唐詩品彙卷之一

新寧高棟編

五言古詩

正始上

太宗皇帝 五首

幸武功慶善宮賦

上所生之宮也。貞觀六年幸之。宴從臣賞賜。問

里同漢沛宛帝歡甚賦詩起居郎呂才。被之管絃為功成慶善樂名九功之舞。

壽丘唯舊跡。豐邑乃前基。粵子承累聖。縣弧亦在茲。弱齡逢運改。提劍鬱匡時。指麾八荒定。懷柔萬國夷。梯山盛入款。駕海亦來思。單于陪武帳。日逐衛文姬。端展朝四岳。無為任百司。霜節明秋景。輕冰結水湄。

芸黃遍原隰禾穎積京坻共樂還鄉宴歡此大風詩

正日臨朝

條風開獻節。仄律動初陽。百蠻奉遐賚。萬國朝未央。雖無舜禹跡。幸欣天地康。車軌同八表。書文混四方。赫奕儼冠蓋。紛紛盛服章。羽旄飛馳道。鐘鼓振岩廊。組練輝霞色。霜戟耀朝光。晨宵懷至理。終愧撫遐荒。

春日玄武門宴群臣

韶光開令序。淑氣動芳年。駐輦華林側。高宴栢梁前。紫庭文樹滿。丹墀衣綬連。九夷遙瑤席。五狄列瓊筵。娛賓歌湛露。廣樂奏鈞天。盈樽浮綠醕。雅曲韻朱絃。粵余君萬國。還慚撫八埏。庶幾保貞固。虛已厲求賢。

經破薛舉戰地

昔年懷壯氣。提戈初仗節。心隨朗日高。志與秋霜潔。移鋒驚電起。轉戰長河決。營碎落星沉。陣卷橫雲裂。一揮氛沴靜。再舉鯨鯢滅。矜茲撫舊原。蜀目駐華軒。沉沙無故跡。減竈有殘痕。浪霞穿水淨。峰霧拖蓮昏。世途亟流易。人事殊今昔。長想眺前蹤。撫躬聊自適。

飲馬長城窟行

塞外悲風切。交河水已結。瀚海百重波。陰山千里雪。迥戍危烽火。層巒引高節。悠悠卷旆旌。飲馬出長城。寒沙連騎跡。朔吹斷邊聲。胡塵清玉塞。羌笛韻金鉦。絕漠干戈戢。車徒振原隰。都尉反龍堆。將軍旋馬邑。

揚麾氛霧靜。紀石功名立。荒裔一戎衣。雲臺凱歌入。

虞世南 三首

世南與兄世基學于顧野王。文章純禱。太宗嘗作宮體詩。使世南和。世南曰。聖作誠工。然體非雅正。臣恐此詩一傳天下。風靡不敢奉詔。帝曰。朕試卿耳。後帝為詩。述古興亡。既而嘆曰。鍾子既死。伯牙不復鼓琴。朕此詩將何所示邪。勅褚遂良。即其靈座焚之。

從軍行

塗山烽候驚。弭節度龍城。冀馬樓蘭將。燕軍上谷兵。  
劔寒花不落。弓曉月逾明。凜凜嚴霜節。氷壯黃河絕。  
蔽日卷征蓬。浮天散飛雪。全兵值月滿。精騎乘膠折。  
結髮早驅馳。辛勤事旌麾。馬凍重關冷。輪摧九折危。

獨有西山將 年年屬數奇

出塞

上將三略遠。元戎九命尊。緬懷古人節。思酬明主恩。  
山西多勇氣。塞北有遊魂。揚桴上隴坂。勒騎下平原。  
誓將絕沙漠。悠然去玉門。輕齎不遑舍。驚策鴛戎軒。  
凜凜邊風急。蕭蕭征馬煩。雪暗天山道。冰塞交河源。  
霧鋒黯無色。霜旗凍不翻。耿介倚長劔。日落風塵昏。

結客少年場

韓魏多奇節。倜儻遺聲利。共矜然諾心。各負縱橫志。  
結交一言重。相期千里至。綠沉明月弦。金絡浮雲轡。  
吹簫入吳市。擊筑遊燕肆。尋源博望侯。結客遠相求。

少年重一顧長驅背龍頭  
皚皚霜戟動耿耿劔虹浮  
天山冬夏雪交河南北流  
雲起龍沙暗木落鴈行秋  
輕生徇知己非是為身謀

魏徵 二首

太宗燕羣臣積翠池徵賦西漢卒云終藉叔孫禮方知皇帝尊帝曰徵言未嘗不紿我以禮及卒帝賦詩痛悼哭為之慟罷朝五日

暮秋言懷

曾夏別京輔杪秋滯三河  
沉沉蓬萊閣日夕鄉思多  
霜剪涼地蕙風捎幽渚荷  
歲芳坐淪歎感此式微歌

述懷

中原還逐鹿投筆事戎軒  
縱橫計不就慷慨志猶存

策杖謁天子驅馬出關門  
請纓繫南越憑軾下東藩  
鬱紆陟高岫出沒望平原  
古木鳴寒鳥空山啼夜猿  
既傷千里目還驚九折魂  
豈不憚艱險深懷國士恩  
季布無二諾侯嬴重一言  
人生感意氣功名誰復論

王績 二首

古意

桂樹何蒼蒼秋來花更芳  
自言歲寒性不知露與霜  
幽人重其德徙植臨前堂  
連攀八九樹偃蹇二三行  
枝枝自相糾葉葉還相當  
去來雙鴻鵠栖息兩鷓鴣  
榮陰誠不厚斤斧亦不傷  
赤心許君時此意那可忘

田家

家住箕山下門枕潁川濱不知今有漢唯言昔避秦  
琴伴庭前月酒勸後園春自得中林士何忝上皇人

許敬宗一首

奉和行經破薛舉戰地應制

混元分大象長策挫脩鯨於斯建宸極由此創鴻名  
一戎乾宇泰千祀德流清垂衣凝庶績端拱鑄群生  
復整璠池駕還臨官渡營周遊尋曩迹曠望動天情  
帷宮面丹浦帳殿曠宛城虜場栖九穗前歌被六英  
戰地甘泉涌陣處景雲生普天沾凱澤相携欣頌平

岑文本一首

奉和正日臨朝

時雍表昌運日正叶靈符德兼三代禮功包四海圖  
踰沙紛在列執玉儼相趨清蹕喧輦道張樂駭天衢  
拂蜺九旗映儀鳳八音殊佳氣浮仙掌薰風繞帝梧  
天文光七政皇恩被九區方陪瘞玉禮珥筆岱山隅

楊師道二首

奉和聖製春日望海

春山臨渤海征旅輟晨裝迴瞰盧龍塞斜瞻肅慎鄉  
洪波迴地軸孤嶼映雲光落日驚濤上浮天駭浪長  
仙臺隱螭駕水府泛鼉梁碣石朝烟滅之罘歸鴈翔  
北巡非漢后東幸異秦皇塞旌羽林客跋距少年場  
電擊驅遼水鷁飛出帶方將舉青丘繳安訪白霓裳

中書寓直詠雨簡褚起居上官學士

雲暗蒼龍闕沉沉殊未開窓臨鳳凰沼颯颯雨聲來  
電影入飛閣風威凌吹臺長簷響暮溜清簾肅浮埃  
早荷葉稍沒新篁枝半摧茲晨悵多緒懷友自難裁  
况復重城內日暮獨徘徊玉階良史筆金馬按天才  
高甍通散騎復道駕蓬萊忠君贈桃李於此非瓊瓌

劉孝孫一首

遊清都觀尋沈道士得仙字

紛吾因暇豫行樂極留連尋真謁紫府披霧覩青天  
緬懷金闕外遐想玉京前飛軒俯松柏抗殿接雲烟  
滄海清夏景嘒嘒早秋蟬橫琴對危石酌醴臨寒泉

聊祛塵俗累寧希龜鶴年無勞生羽翼自可狎神仙

凌敬一首

賦前題

聊排靈鎖闥徐步入清都青溪冥寂士思玄徇道樞  
十芒生藥笥七焰發丹爐縹緲裘桐君錄朱書呈母符  
宮槐散綠穗日董落青村矯翰雷門鶴飛來葉縣鳧  
凌風自可御安事迫中區方追羽化侶從此得玄珠

趙中虛一首

賦前題

青溪阻千仞姑射藐汾陽未若遊茲境探玄衆妙場  
鶴來疑羽客雲汎似霓裳寓目雖靈宇遊神乃帝鄉

道存真理得心灰俗累忘烟霞疑抗殿松桂肅長廊  
早蟬清暮景崇蘭散晚芳即此翔寥廓非復控榆枋

董思恭 一首

二婦艷

大婦裁紵素中婦弄明璫小婦多姿態登樓紅粉粧  
夫人且安坐初日漸流光

王紹宗 一首

三婦艷

大婦能調瑟中婦詠新詩小婦獨無事花庭曳履綦  
上客且安坐春日正遲遲

上官儀 二首

早春桂林殿應詔

步輦出披香清歌臨大液曉樹流鶯滿春堤芳草積  
風色一作光翻露文雪華上空碧花蝶來未已山光暖  
將夕

訓薛舍人萬年宮晚景寓直懷友

奕奕九成臺窈窕絕塵埃蒼蒼萬年樹玲瓏下冥霧  
池色搖晚空巖花斂餘照清切丹禁靜浩蕩文河渺  
留連窮勝託夙期睽善譔東望安仁省西臨子雲閣  
長嘯披烟霞高步尋蘭若金狄掩通門雕鞍歸騎喧  
燕餘對明月荆艷促芳樽別有青山路策杖訪王孫

張文琮 一首



同蕃屯田冬日早朝

假寐懷古人夙興瞻曉月通晨禁門啓冠蓋趨朝謁  
霜靄清九衢霞光照雙闕紛綸文物紀煥爛聲明發  
腰劔動陸離鳴玉和清越未疑有開

章懷太子一首

黃臺瓜辭武后殺太子弘而立賢為太子賢日懷憂揚知不能保全無由

敢言乃作是辭命樂工歌之冀后聞而感悟後終為所逐死於獄中

種瓜黃臺下瓜熟子離離一摘使瓜好再摘令瓜稀  
三摘尚云可四摘抱蔓歸

王勃四首

山亭夜宴

桂宇幽襟積山亭涼夜永森沉野徑寒肅穆岩扉靜  
竹晦南河色荷翻北潭影清興殊未歸一作林端照

初景

詠風

肅肅涼景生加我林壑清驅烟尋磴戶卷霧出山楹  
去來固無跡動息如有情日落山水靜為君起松聲

懷山并序

客有自幽山來者起予以林壑之事而烟霞在焉  
思解纓紱永詠山水神與道超跡為形滯故書其  
事焉

鶴岑有竒徑鱗洲富仙家紫泉漱珠液玄岩列丹葩

唐詩一卷  
常希披塵網眇然登雲車鸞情極霄漢鳳相疲烟霞  
道存蓬瀛近意愜朝市賒無為坐惆悵虛此江上華

忽夢遊仙

僕本江上客牽跡在方內寐寤霄漢間居然有靈對  
翕爾登霞首依然躡雲背電策驅龍光烟途儼鸞態  
乘月披金帔連星解瓊珮浮識俄易歸真魂莫難再  
寥廓沉遐想周遑奉遺誨流俗非我鄉何當釋塵味

楊炯三首

廣溪峽

三峽有  
序不錄

廣溪三峽首曠望兼川陸山路遠羊腸江城鎮魚腹  
喬林百丈偃飛水千尋瀑驚浪迴高天盤渦轉深谷

漢氏昔云季中原爭逐鹿天下有英雄襄陽有龍伏  
常山集軍旅永安興板築池亭忽已傾邦家遽淪覆  
庸才若劉禪忠佐為心腹設險猶可存當無賈生哭

和訓號州李司法

唇齒標形勝關河壯邑居寒山抵方伯秋水面鴻臚  
君子從遊宦忘情任卷舒風霜下刀筆軒蓋擁門閭  
平野芸黃遍長洲鴻鴈初菊花宜泛酒蒲葉好裁書  
昔我芝蘭契悠然雲雨踈非君重千里誰肯惠雙魚

右半體詩

今附於此

西陵峽

絕壁聳萬仞長波射千里盤薄荆之門滔滔南國紀

楚都昔全盛高丘烜望祀秦兵一旦侵夷陵火落起  
四維不復設關塞良難恃洞庭且忽然孟門終已矣  
自古天地闢流為峽中水行旅相贈言風濤無極已  
及余踐斯地環竒信為美江山若有靈千載伸知己

駱賓王 三首

夏日同夏少府游山家

返照下層岑物外狎招尋蘭徑薰幽佩庭落暗金  
谷靜風聲徹山空月色深一遣樊籠累唯餘松柱心

晚憇田家

轉蓬勞遠役披薜下田家山形類九折水勢急三巴  
懸梁接斷岸漩路擁崩查霧崑淪曉魄風叙漲寒沙



歸來謝天子何如馬上翁

贈李滎道士

有序不錄

錦節銜天使瓊仙駕羽君投金翠山曲首壁清江濱  
圓洞開丹鼎方壇聚絳雲資貺幽難識空歌迥易分  
風搖十洲影日亂九江文敷誠歸上帝昭應在明君  
獨有南冠客耿耿泣離群遙看八會所真氣曉氛盪

早度分水嶺

千年遊蜀道萬里向長安徒費周王粟空彈漢吏冠  
馬蹄穿欲盡貂裘敝轉寒層冰橫九折積石凌七盤  
重谿既下漱峻峯亦上千隴頭聞戍鼓嶺外咽飛湍  
瑟瑟松風急蒼蒼山月團傳語後來者斯路誠獨難



三月曲水宴

風煙彭澤里山水仲長園由來棄銅墨本自重琴樽  
高情邈不嗣雅道今復存有美光時彥養德坐山樊  
門開芳杜逕室距桃花源公子黃金勒仙人紫氣軒  
長懷去城市高詠狎蘭蓀連沙飛白鷺孤岨嘯玄猿  
日影巖前落雲花江上翻興闌車馬散林塘夕鳥喧

奉使益州至長安發鍾陽驛

躋險方未夷乘春聊騁望落花赴丹谷奔流下青嶂  
葳蕤襍樹滋澁漾春江漲平川看釣侶狹徑聞樵唱  
魚戲綠苔前鶯歌白雲上耳目多異賞風烟有奇狀  
峻阻擗長城高標吞巨舫聯翩事羈勒辛苦勞疲恙

夕濟幾潺湲晨登每惆悵誰念復芻狗山河獨偏喪

和王夔秋夜有所思

秋寂南軒夜悠然懷所知長河落鴈苑明月下鯨池  
鳳臺有清曲此曲何人吹丹唇問玉齒妙響又雲涯  
窮巷秋風葉空庭寒露枝勞歌欲有和星鬢已將垂

詠史

季生昔未達身辱功不成髡鉗爲臺隸灌園變姓名  
幸逢滕將軍兼遇曹丘生漢祖廣招納一朝拜公卿  
百金孰云重一諾良匪輕廷議斬樊噲群公寂無聲  
處身孤且直遭時坦而平丈夫當如此唯唯何足榮

大漢昔云季小人道遂振玉帛委奄尹斧鑕嬰縉紳  
邈哉郭先生卷舒得其真雍容謝朝廷談笑獎人倫  
在晦不絕俗處亂不為親諸侯不得友天子不得臣  
冲情甄負甌重價折用巾悠悠天下士相送洛橋津  
誰知仙舟上寂寂無四隣

三

公業負奇志交結盡才雄良田四百頃所食常不充  
一為侍御史慷慨說何公何公何為敗吾謀適不同  
仲穎恣殘忍廢誠良在躬死人如亂麻天子如轉蓬  
干戈及黃屋荆棘生紫宮鄭生運其謀將以清國戎  
時來命不遂脫身歸山東凜凜千載下穆然懷清風

劉庭芝

將軍行

將軍闢轅門耿介當風立諸將欲言事逡巡不敢入  
劍氣射雲天鼓聲振原隰黃塵塞路起走馬追兵急  
彎弓從此去飛箭如雨集截圍一百重斬首五千級  
代馬流血死胡人抱鞍泣古來養甲兵有事常討襲  
乘我廟堂運坐使干戈戢獻凱歸京師軍容何翕翕

從軍行

秋天風颯颯群胡馬行疾嚴城晝不開伏兵暗相失  
天子廟堂拜將軍凶門出紛紛晉陽道戎馬幾萬疋  
軍門壓黃河兵氣衝白日平生懷仗劍慷慨即投筆

南登漢月孤。北走代雲憂。近取韓彭計。早知孫吳術。  
丈夫清萬國。誰能掃一室。

嵩嶽聞笙

月出嵩山東。月明山益空。山人愛清景。散髮臥秋風。  
風止夜河清。獨夜草蟲鳴。仙人不可見。乘月近吹笙。  
絳唇吸靈氣。玉指調真聲。真聲是何曲。三山鸞鶴情。  
昔落塵俗願。言聞此曲。今來臥嵩臯。何幸承幽音。  
神仙樂吾事。笙歌銘夙心。

秋日題南陽潭壁

獨坐秋陰生。悲來從此適。行見汝陽潭。飛蘿蒙水石。  
懸瓢木葉上。風吹何歷歷。幽人不耐煩。振杖步閑寂。

迴流清見底。金沙覆銀礫。錯落非一文。空隴幾千尺。  
江相魚鱗紫。鴨毛自然碧。吟詠秋水篇。渺然亡損益。  
秋水隨形影。清濁混心迹。歲暮歸去來。東山余宿昔。

采桑

楊柳送行人。青青西入秦。誰家采桑女。樓上不勝春。  
盈盈灞水曲。步步春芳綠。紅臉耀明珠。絳唇含白玉。  
回首渭橋東。遙怜春色同。青絲嬌落日。細綺弄春風。  
携籠長嘆息。逶迤戀春色。看花若有情。倚樹疑無力。  
薄暮思悠悠。使君南陌頭。相逢不相識。歸去夢青樓。

春女行

春女顏如玉。怨歌陽春曲。巫山春樹紅。沅湘春草綠。

自怜妖艷姿粧成獨見時愁心作楊柳春盡亂如絲  
目極千餘里悠悠春江水頻想玉關人愁臥玉闥裏  
尚言春花落不知秋風起嬌愛猶未終悲涼從此始  
憶昔楚王宮玉樓粧粉紅纖腰弄明月長袖舞春風  
容華委西山光陰不可還桑林沒東海富貴今何在  
寄言桃李容胡爲墜閨重但看楚王墓唯見數株松

孤松篇

蠶月桑葉青鶯時柳花白澹艷煙雨姿敷芳陽春陌  
如何秋風起零落從此始獨有南澗松不嘆東流水  
玄陰天地冥皓雪朝夜零豈不惟寒暑爲君留青青  
青青好顏色落落任孤直群樹遙相望衆草不敢逼



靈龜卜真隱仙鳥宜栖息耻受秦帝封願言唐侯食  
寒山夜月明山冷氣清清凄兮歸鳳集吹之作琴聲  
松子臥仙岑寂聽疑野心清冷有真曲樵米無知音  
美人何時來幽徑委綠苔吁嗟深澗底棄捐廣廈材

謁漢世祖廟

春陵氣初發漸臺首未傳列營百萬衆持國十八年  
運開朱旗後道合赤符先宛城劔鳴匣昆陽鎗應弦  
獷獸血塗地巨人聲沸天長驅過北趙短兵出南燕  
太守迎門外王郎死道邊昇壇九成陌端拱千秋年  
朝廷方雀躍劔佩幾聯翩至德刑四海神儀翳九泉  
宗子行舊邑恭聞清廟篇君容穆而聖臣像儼猶賢



唐詩一卷  
十五  
攢木承危柱。踈蘿挂朽椽。祠庭巢鳥喙。祭器網蟲緣。  
懷古江山在。惟新曆數遷。空餘今夜月。長似舊時懸。  
盧崇道

新都南亭別郭大元振

竹徑女蘿蹊。蓮洲文石隄。靜深人俗斷。尋翫往還迷。  
碧潭透初月。素林驚夕栖。褰幌納鳥侶。罷琴聽猿啼。  
佳辰改宿昔。勝寄在睽携。長懷賞心愛。如月復如珪。  
喬知之

苦寒行

胡天夜清迥。孤雲獨飄揚。搖曳出鴈關。逶迤含晶光。  
陰陵久徘徊。幽都無多陽。初寒凍巨海。殺氣流大荒。  
朔馬飲寒冰。行子履胡霜。路有從役倦。臥死黃沙場。  
羈旅因相依。慟之淚沾裳。由來從軍行。嘗存不賞亡。  
亡者誠已矣。徒令存者傷。

從軍行

南庭結白露。北風掃黃葉。此時鴻鴈來。驚鳴催思妾。  
曲房理針線。平砧搗文練。鴛綺裁易成。龍鄉信難見。  
窈窕九重闈。寂寞十年啼。紗窓白雲宿。羅幌月光栖。  
雲月曉微微。愁思流黃機。玉霜凍朱履。金吹薄羅衣。  
漢家已得地。君去將何事。宛轉結春書。寂寞無鴈使。  
平生荷恩信。本爲容華進。况復落紅顏。蟬聲催綠髮。  
蘇味道

單于川對雨

崇朝邁行雨薄晚屯密雲緣階起數沫竟水聚圓文  
河柳低未舉山桃落已芬清樽久不薦淹留遂待君

李嶠

嶠兒時曾夢人遺之雙筆  
自是有文詞富才思云

秋山望月酬李騎曹

愁客坐山隈懷抱自悠哉况復高秋夕明月正徘徊  
亭亭出迴岫皎皎映層臺色帶銀河滿光含玉露開  
白雲籠影度虛暈抱輪迴谷邃涼陰靜山空夜響哀  
寒催數鴈過風送一螢來獨軫離居恨遙憶故人杯

早發苦竹館

合水巖嶂深朦朧烟霧曉荒阡下樵客野猿驚山鳥  
開門聽潺潺入徑尋窈窕栖厓抱寒木流螢飛暗篠  
早霞稍霏霏殘月猶皎皎行看遠星稀漸覺遊氛少  
我行撫輶傳兼得旁林沼貪翫水石竒不知川路渺  
徒憐野心曠詎惻浮年小方解寵辱情永託累塵表

安輯嶺表事平罷歸

雲端想京縣帝鄉如可見天涯望越臺海路幾悠哉  
六月飛鷁去三年瑞雉來境遙銅柱出山險石門開  
自我違瀝洛瞻途髮揮霍朝朝寒露多夜夜征衣薄  
白簡承朝憲朱方撫夷落既弘天覆廣且諭皇恩博  
皇恩益外區憬俗詠來蘇聲朝臣天子壇場拜老夫

絳宮韜將畧黃石寢兵符返旆妝龍虎空營集鳥鳥  
日落澄溪靄馬馮高視衿帶東甌抗干越南斗臨吳會  
春色遠邊陲飛花出方外卉服紛如積長川思遊客  
風生丹桂晚雲起蒼梧夕去軸艤清江歸軒趨紫陌  
衣裳會百變朕責委重關不學金刀使空持寶劍還

崔融

關山月

月生西海上氣逐邊風壯萬里照關山蒼茫非一狀  
漢兵開郡國胡馬窺亭障夜夜聞悲笳征人起南望

擬古

飲馬臨濁河濁河深不測河水自東注河源迤西極

思君正如此誰為生羽翼日夕大川陰雲霞千里色  
所思在何處宛在機中織離夢當有菟愁客定無力容  
夙齡負奇志中夜三歎息拔劍斬長榆彎弧射小棘  
班張固非擬衛霍行可即寄謝閨中人努力加飡食

塞垣行

疾風卷溟海萬里揚沙礫仰望不見天昏昏竟朝夕  
是時軍兩進東拒復西摘蔽山張旗鼓間道潛鋒鏑  
精騎突曉圍奇兵襲暗壁十月邊塞寒四山互陰積  
雨雪鴈南飛風塵景西迫昔我事討論未嘗息經籍  
一朝棄筆硯十年操矛戟豈要黃河誓須勒燕山石  
可嗟牧羊臣海外久為客

西征軍行遇風

北風卷塵沙。左右不相識。颯颯吹萬里。昏昏同一色。  
馬煩不敢進。人急未遑食。草木春更悲。天景晝相匿。  
夙齡慕忠勇。雅尚存孤直。覽史懷浸驕。讀詩嘆孔棘。  
及茲戎馬地。忝從書紀職。兵氣騰北荒。軍聲振西極。  
坐覺威靈遠。行看祲氛息。愚臣何以報。倚馬申微力。

杜審言送和蕃使

一首

使出鳳凰池。京師易春晚。聖朝尚邊策。詔諭弓戈偃。  
拜手明光殿。搔心上林苑。種落踰青羗。關山度赤坂。  
疆場及無事。雅歌而殮飯。寧獨息和戎。更當封定遠。  
唐詩品彙卷之一

唐詩品彙卷之二

正始下

沈佺期

有所思

君子事行役。再空芳歲期。美人曠延佇。萬里浮雲思。  
園槿綻紅艷。郊桑柔綠滋。坐看長夏晚。月生照羅帷。  
臨高臺

高臺臨廣陌。車馬紛相續。迴首思舊鄉。雲山亂心曲。  
遠望河流緩。周看原野綠。向夕林鳥還。憂來飛景促。

黃鶴

黃鶴佐丹鳳。不能群白鷗。拂雲遊四海。弄影到三山。